

三怡堂叢書

紫山大全集

五九

三才圖會

卷之四

七

紫山大全集卷二十三

三怡堂叢書

元 胡祇遹 撰

雜著

縣政要式

置軍民站匠諸色戶計各鄉保村莊丁口產業鼠尾簿一
扇各戶留空紙一面于後凡丁口死亡或成丁或產業孳
畜增添消乏社長隨即報官于各戶下令掌簿吏人即便
標注凡遇差發絲銀稅糧夫役車牛造作起發當軍檢點
簿籍照各家即日今增損氣力分數科攤不偏枯不重并
使奸吏不能欺謾至於土田婚姻驅良頭疋債負一切詞

訟一一憑籍照勘此籍如一縣之大圓明鏡物來卽應妍
醜莫逃續有分房析居復業還俗于驅爲良等戶亦依上
標附又置交參分外來寄居別撥下諸雜戶計簿一扇以
備互相爭訟二簿一一從實無得漏落包套隣佑王首社
長互相保結不實者罪之各村荒閑官地及牧馬營盤亦
抑于各村下標注此籍旣定別寫一扇申州申府頓放互
相照勘事君敬其事而後其食此人臣之常分也主爾忘
身公爾忘私國而忘家志在于立功樹名富貴不萌于心
此人臣之常職也卽今觀之上自執政下及州縣以培克
聚歛爲通才以苞苴邀結爲得計不究己之才不才甫霑

一命卽望台司金玉滿堂愈懷氣肯出憂國之一言衆指以爲妖訛舉愛民之一事咸疾以爲狂妄虛文具于督責實效墮于杳茫敗事者無罪成算者無功廉公謹勅者反謂之好名賊污賊蠹者反謂之才幹駟僇青紫倡優佩章印奪攘矯虔布滿中外長舌刺口變是爲非婢膝奴顏進堦增秩甚至鬻女而貨妻奚啻吮癰而舐痔言語煦煦相取下戈戟伏于中心同仕數年再相遇則白眼若不相識小人同惡相濟結爲朋黨此千古之長情也今則不然相誓指天日非誠也刺血爲盟言非誠也握手出肺肝非誠也出妻見子非誠也升堂拜父母非誠也通才納賄非

誠也面譽而背非朝諾而夕畔雖蛇蝎虎狼不食其類乃甘心而忍爲雖鬼蜮優倡不欺其徒乃面謾而無耻詭譎不測變詐無窮人心之惡一至於此內外同風不以爲怪不惟僚屬朋友之若是子焉而訐其父弟焉而訴其兄妻妾訟夫王奴隸誣長上天道人倫悖逆斲喪瀰漫壞爛一至於此于所厚者薄有此理歟有識者坐視而不可救固當緘口結舌亦安得不爲之寒心哉聖人知民生之有欲不可不爲之防故因其性之固有使人共受禮樂教化之功也聖人身行政人倫亦正恐遠方遐域不能見聞立五服公侯伯子男設庠序學校以訓誨教養之薰陶以詩書

禮樂以成德焉教而不從董之以威刑政是也刑者救惡
于已然兵亦刑也誅其長惡不悛者也後世救時宰相謀
不及此事至而不爲之備患生而不爲之防不能積九年
之蓄而爲救荒開廩勸糶之法不能使比屋可封故嚴立
不孝不悌不睦之刑不能使風俗朴素樂于務本故有抑
游惰重商稅賤倡優雜類之政不能定立田制一夫百畝
故有限公私田之制不能使民不爲非故有警夜巡捕之
禁不能使死徙無出鄉重祖先邱隴故有招誘捕捉殍人
親戚隣里之刑陵夷至於近世苟且弊政又不能行事至
物來專以刻薄督責爲言逼迫威虐爲務示己之才陷人

于罪歸功于已嫁禍于人欺天罔上具文無實交結權貴
增秩遷官諂媚士夫沽名釣譽民困瘁而不恤憂私財之
不足致紊亂而反喜得縱恣而爲奸加之常憲寬弘惡不
必罰善不必褒以不公之毀譽定人才之黜陟以風聞之
是非爲功過之實迹苟且滅裂貪汚日甚一日具曰予聖
孰知烏之雌雄正謂今日移謀本司遍行所屬照條畫節
文百姓不得越訴諸衙門各有分限不得受越訴推原立
法本意司縣者親民之官日與小民相親情僞易見不能
欺蔽責任不可不專不專則怠惰推遞紛亂繁冗久不能
決故罪有五十七以下司縣決之小民所爭訟不過婚

姻債負良賤土田房舍牛馬鬪毆而已所犯若無重罪司
縣皆當取決不合申州申府申總府申提刑司卽今司縣
官吏貪邪每遇上項本職合斷事理于元告人被論人處
兩下受訖賄賂或瞻狗囑託或畏避形勢欲從正歸結則
恐倒錢告訐欲從邪處斷則恐提刑司照刷兼負冤者不
肯准服所以申州申府一解釋怨謗二洗雪已過嫁是非
于州府爲州府得此復效司縣所爲嫁是非于總府總府
復效州縣貪求厭足調發于州縣以致或爭地一畝價錢
不直數貫上下前後官吏行賕費鈔數百貫逗留七年十
年不能杜絕中間兩家隨衙諸干連人隨衙妨廢農功生

業不可計數隨衙之間呼喚不著小吏獄卒百端凌辱小
心畏法者以致飢飽勞役輕則因而成疾重則致命者往
往有之家有疾病死亡之憂而不敢離衙門者有之如此
怨苦皆原於妄申妄受當決不決擬合遍下照依條畫司
縣當決而不決妄行作疑申州中府者初犯品官罰俸司
吏核罷再犯三犯則品官解任州府總府妄申妄受者亦
如之合行移牒請照驗申臺照詳乞賜明降遵依施行

精選縣令

辦事愛民莫親於縣令縣令得人則事辦而民安舉非其
人則事不辦而民失業卽今縣令多非其材省部不務精

選兼品秩卑下州府驅委呼召殊無禮貌英俊才氣之人
視不屑爲十分爲率大半不識文墨不通案牘署銜書名
題日落筆一出於文吏之手事至物來是非緩急閉口不
能裁斷袖手不能指畫顛倒錯繆莫知其非雖有縣令與
虛位同今後擬注縣令省部試以身言書判問以治民之
方年六十以上精神才力昏耗者不可擬注身言書判不
兼全者不注省會州府不得差委職

論併州縣

州縣何爲而併也戶口寡而官吏繁民力不足以拱掎克
十羊不足以容九牧也併州縣則其便有三減祿食舒民

力一也每縣胥吏鄉司理正之徒五六十人并祗俟弓手足解不下百餘人每家歲用衣食鈔百貫舉取足於民今皆廢罷而民免蠶食之苦二也每縣又得五六十家務本趨農昔爲蠹民之害而今爲納差之戶三也其不便者二縣併則辭訟賦稅遙遠一也巡盜賊尉司勞苦二也二者不難治平解紛糾警察寇盜則委商酒務主之無致生發無令起訟賦稅遙遠則仰本縣當絲銀徵納之際各就本土置官收受無令百姓勞苦如此則併州縣實爲善政不必多論俟其戶口增息政繁事冗則量宜復置外戶口鮮少不宜立總管府者亦當合併衛輝等處是也宜立總管

府者復當合而爲一東平是也難者必曰併之則頭項有
言是大不然土城邑仍舊戶口差撥仍舊各頭項所設達
嚕噶齊仍舊官制禮儀旣官爲總府者不敢無故呼召凌
辱州縣然則何苦而不願也兼自天恩列土以來衆統寡
大臨小行之到今五六十年而無一言何獨至於今日而
有言哉其實一縣也一州也強名之爲一路是蒙虛名而
受實費也難者必曰併之則總府權重是又不然往日諸
侯世官擅生殺禍福聚斂封植之權故一方愚民不知有
朝廷之尊而知有諸侯也今之總管府有如是之權歟常
賦之外不敢擅一錢流罪以上之刑一一申部五十月而

遷徙何重權之有何過慮之甚也難者必曰鄉民之情升
縣爲州則喜降州爲縣則慘然不樂是又不然民可使由
之不可使知之得虛美而受實禍小民之言何足恤哉難
者必曰往年辯者以減併州縣促削封疆恐爲外人所笑
是何理之言也夫所謂之促削者千里之地爲他人得其
九今也爲百里百里之地爲他人得其五今爲五十里毀
千雉之城爲百雉是所謂促削也土地如舊城郭如舊何
謂促削哉使田野不闢戶口不增雖升縣爲郡升州爲京
張夸名而無實用然則何益矣不知反爲遠人之大笑也
此皆一時蒙昧便佞之空言今已不辯而自明亦不足恤

論府州縣官

府州縣官不合一例俱年老或年幼俱識字或不識字每補一人宜照已任者何人宜老幼文武間有不合勿止問此人合作刺使止有某州刺使闕便令補上不問見任諸員何人又用此人爲同僚無乃偏枯否按察使最急當舉州府縣定功過朝廷既有五責辦集者不辦集者具一律遷轉何以懲有過勸有功而合周官六計弊吏之旨哉

民間疾苦狀

一逃戶不能復業

今日離業明日官司將拋下物業便行典賣訖

一見在戶替代逃戶差發

假令元抄十戶逃訖五六戶見在戶包當

一稅屋間架今古並無比例木植苞灰丁線已行稅訖今又稅屋甚為重併

一稅羊重并既於每羣內不計多少抽分訖羊口又行收毛收皮納稅每遇造作復於民間取要

一本場皮貨山查河泊冗事合行革罷併入稅務

一稅物不問時估止由闌頭合千人等高下價直以憑取

稅

一婚嫁之物既非買賣營利不宜收稅

一站口既當馬匹又當祇應酒食委實重併困弊

一一切和雇和買造作并不得錢近年親管官吏擅行和

買虧價十九

一社長並不益民止助貪汚官府鳩歛錢物侵剝細民合

行罷去

一府州司縣每遇祇待使客自裊褥床榻油鹽菜蔬酒肉
椀碟匙筯柴灰等物一切科歛于民使客旣去諸物爲之
一空並不還主

一搖民甚多正當差戶極少當議減革

一自立監并巡行官以來不勝煩擾民竹十廢八九官竹
十損六七當罷竹監及巡行官民間許令種竹依價收稅
官竹委付土官一員掌管發賣

一巡鹽官不得擅自擾民事發之家當土官鞠問

一鹽法頗壞斤兩不足當依舊法滿足民間食鹽聽從商

旅兩平貨賣官司不得椿配

一白著無名錢宜許赴按察司陳告

一凡遇和雇和買夫役不問多寡即行遍科宜嚴加禁治

一親臨官和買和賣籍補宜行禁斷政弊

一冗司當罷

省部臺院外酌古則無有准今則繁冗者皆當削去

一冗員當減天無

二日民無二王尊無二上人無二首故設官分職省部以

降崇卑雖不同爲長之官止合一員佐貳僚屬視事之繁

簡則或倍徒焉長官一員則裁決歸一而不分競僚佐倍

之則常務煩多足以代勞即今六部尙書八九員侍郎郎

中員外郎各一二宣慰使七八員同知副使各一人正如

人二身入首而一足貽笑千載舉此一二他可類推最不適用

虐下生事虛費俸錢鋪馬祗待
者宣司奏差等官宜十減八九

一冗吏當減

一冗文當革冗文不革則冗吏不能減何爲冗文無妄受
無越訴無疏駁不法無申呈無度如是則冗文十去其七

八

一信賞必罰則功多而過少今皆不行公勤者未必賞汚
怠者未必罰按察司並不察舉害民貪汚者反爲良吏奉
公廉潔者反爲庸鶩

一賄賂公行則百務紊亂民冤無訴宜禁治嚴切欲斷賄

賂莫若賞廉罪貪

一鈔法已壞當行拯救拯救之法無他推其致壞之由而

改之

一倉廩不實各覈實

一取人入仕無法合行講

即今冗員既減十之四五有罪罷無罪者聽除亦可經敷選而

不闕

一江南重地難得易失所任非人合行精選

仰按察司體察罪重者去

輕者降留無功過者依例有功過者分別

一濫官雖罷私贓富厚宜許諸人陳告復還本主彼此俱

罪者入官

一諸路庫藏倉廩有名無實當從點勘

一公家與民爭利衙門宜有革罷

一錢穀官不宜貨賣宜於隨朝服勞人子弟任選用

一不經省部銓注職名如本路奏差提領驗數官知數河泊官之類宜盡行罷去

一官吏斷事無法可守當議頒降條法不致罪一而刑異姦吏因緣高下其手

一諸路戶計東移西竄南徙北遷消乏者不減差興盛者不增賦宜委本路公舉廉慎官同按察使官一員從實抄數仍據戊戌壬子兩次何處附籍仍據本家見在物力除

爲清冊以憑從實定奪差賦

一江南平定通爲一家南民卽我民南兵卽我兵也既有
券軍使令北軍宜少休息每歲輪番一半南戍一半還家
作活資養軍力

一不因才能勞效門閥以錢得官者宜盡行退罷卽以才
能勞效門閥之人代之

一宣使奏差一切使臣不問土官有無罪犯下馬便行取
招重行打發輕則土物歛及於民宜行禁斷差帖上亦不
得妄寫惡言徒使朝廷失大體而不威官吏無耻而苟免
一某自起身至據台鼎專以賄賂左右迎合上意爲務故

能使受賄者投間抵隙交口薦譽迎合偵伺無不如意自
斯人顛覆以來受惠者一無所得思慕之心追懷克己相
繼爲政者循覆轍則不可新易途則招謗謗言日多不惟
不能施爲雖欲身安其位庸可得乎當自侍御僕從有出
身有賜賚以代私恩不使怨怒不惟立酬勞報功之令典
亦庶幾杜絕苞苴賄賂私相恩讐之非念

一江南民心未甚結固不可屢失自收附以來兵官嗜殺
利其反側叛亂已得縱其擄掠貨財子女則入於軍官壯
士巨族則殄殲於鋒刃一縣叛則一縣蕩爲灰燼一州叛
則一州淪爲邱墟然則於國何益矣申縣申省反以爲功

朝廷不究結所以反叛之由而慣賞其將卒定亂之勇人
情孰不欲安屋粟火食夫耕婦織賦役之外養老慈幼樂
享太平此億兆之一心也今也棄此遐福去生就死甘爲
肝腦塗地父母妻子駢首受戮者是何心哉是蓋牧民者
有以激之使然前省所選人員例以賄賂得官屠沽鬪僧
市井無賴羣不呈之徒十居七八詩云愷悌君子民之父
母使若輩治民欲民之安則不可得矣淫奪人妻子強取
人財產田宅馬牛羊畜聽訟之間恣情枉法以是爲非以
非爲是百計千方務在得錢民之冤抑無所控告司縣司
府上下一律哀聲怨氣鬱積而不能發所以冒死而不顧

國家自平金以來有事於宋五六十年而後混一豈不艱
哉良將精卒經營戰鬪於數世一旦以濫官汚吏恣其貪
殘而壞之惜哉

一江東陳米經歲既久皆不可食今已水旱脚力運漕於
委曲萬餘里之外何不思之甚也以致沉船破車奪民時
廢民力死損牛畜虛損盤費官吏不能交割多自經逃竄
所運米石堆積水邊上雨下濕腐朽敗爛積今四五年間
問根起發斛數若干今到某所某倉若干已十損其七八
矣所存者又皆爲糞土若此繆筭卽合停罷

一御史臺按察司彈糾貪汚申明寃滯實省部儲司之藥

石也省不知與已爲助反視之如仇讐百端沮抑是以近年以來當是任者全身遠禍閉口不言而吏書史者委靡貪污與州縣吏無異甚者反與之文過飾非隱比其罪惡滋長其貪冒自今以往當激勵振作碌碌無稱者退罷少犯贓污視州縣官吏加一等治罪終身不復叙用

一倉場庫務諸錢穀官雖非所以處清流待英才之地亦無以市井細民賂以貨財而可得者上以財賂賣之下以貨賄得之上下交征利又無出身欲戒人以不盜何不恕之甚也卽今贓污之弊莫甚於此愚謂宜准在代舊例以待有功之子孫有月給有增秩拜官盜錢得罪之科如是

則國無賣官之羞人絕僥倖之念錢穀入官而不入於私
家人矜廉潔而有光於祖考茲事非難當革前弊凡隨駕
日久如集賽台等子姪弟兄戶選一名補助不願者聽責
成於漢人以蒙古人領其事而不課其殿最

一前省官私心本欲貴其子孫恐人有言故每職多設冗
員如六部宣慰司之類是也或以貨賂或以請託不論人
材不遵銓調昨日一布衣今日受三品命服日月不深資
品卑下而遽陞三品宰相者股肱之寄往往皆帶相銜遂
使僥倖之徒視名品如拾芥卑小官而耻爲曰某人尙得
某官我爲何而居下列曰某人尙拜某爵我爲何而受斯

命輕易名器以至于此當議改格

一遞送造作必不能無弊姦吏因緣害衆合著夫匠十名
乃科百名以至數多則遍科今後省部立式符下各土著
置立簿集鼠尾人民及工匠花名遇有遞送造作輪次應
當周而復始仍令通文墨廉慎官吏封掌凡有遞送前路
文字及宣使奏差到路輒不得便集人夫先差人於前路
探伺到來的實月日然後集衆若恐耽悞旣承文字卽於
簿集上照勘某人今次該差計幾名公文先報得知管得
在家聽候續聽指揮某日須要到來應役如此則公務亦
辦不致稽留農工妄奪民力盜養姦吏

一拘刷牛皮之虐農人牛死舉家哀號不經申官不敢開
剝皮角皮革略有損壞又復壞錢或時值暑月入城遙遠
往復之間肉已腐爛近日復有濫官下村親行拘刷或翻
挑舊事或每活牛一頭攤鈔五百一貫似此虐政卽合罷
去合用牛皮新納包銀不勞而足

一軍人應役還家一往一來之弊官自分撥以來紛擾重
併民不勝其困弊吏橫恣其姦欺何以知之假如一戶軍
戶某人係某縣某村元籍某年爲始簽作軍戶根脚係隸
某官帳下應役到今不曾改撥如此則或有軍前因事因
病身故或避役在逃交替不至或艱難疾病單丁不能應

役或元籍戶頭身故子孫更改官名及一切事故管軍官
照驗各人鄉貫姓名移文本管鄂勒官勾追補發若網在
網有條而不紊自一經分撥別隸他人所管行伍不相識
官吏無籍冊可照一憑本人稱呼中間不無欺詐不惟如
是或又於某年再經分撥或又於某年某歲累經分撥遇
有前項事故展轉推求不見根腳出軍吏人亦非經手舊
吏是以妄行移文勾追鄂勒吏人照得與元籍姓名點畫
少差却行廻文審問一問一答往復經歲軍前既承廻文
不無自疑遂於他路勾喚似此紛亂純實謹畏者恐遭罪
責或已親行當又復雇覓或兩處重當不能辨明不得交

代以至壞產破家無處申訴不畏官法敢爲姦欺者賄賂
鄂勒官吏通同作弊或在家而云已行應役去訖或富貴
而妄言貧難或身在而言身故或有餘丁而云戶絕或妄
以鄉貫村庄姓名爭差爲間逗遛歲月似此欺蔽不止一
端究其受病之源皆出於分撥竒零隸屬無定卽今南方
無事管軍官員數太多名爲萬戶軍不滿千千戶軍不滿
百降至鎮撫百戶有止管二三人者是所謂十羊九牧者
也照得管軍官員亦非皆出於累世將家勲舊武弁以一
時軍功得官今乃袖手癡坐無高爵之可邀無厚祿之可
得無精兵銳卒之可管意亦顛望國家憂恤莫若檢照各

官如根脚尙日淺年老無子侄可代者與一優便差除祿以養廉軍官旣減則散軍可併散可併則可復無籍可併可復則選擇良將善撫馭者於要害重鎮屯戍以之鎮守則威重而姦亂不生緩急有用則精銳成師而得力往復交代及一切事故則不至於肥吏而瘠民欺官而悞事

一鈔虛之由有自來矣盜臣私印添價以買諸物一也置立總庫總局舉放出息輕付於無賴狂貪買官之人動輒千萬錠二也鈔法無定鈔十四兩八錢當金一兩卽今官買金每金一兩該鈔一百五十貫自壞其法三也賄賂公行執權者止要良金美女俊馬奇珍百倍其價物重則鈔

輕四也盜臣得以私印諸路官庫反不支發民間無以倒換五也近年以零鈔消磨盡絕土司並不印發零鈔不行物價自重六也能除六弊鈔法自實

一前省官自謂于國盡忠靳惜財物不敢妄支虛費遂于諸投下五尺絲銀遂賜暨諸犒賜等物不肯依時應副巧計開除不滿合得元數所與之物金銀匹段亦皆低歹不堪使用衣着今次事發爲人首告假銀足爲明驗實失諸王心怨歸於上何足以爲忠古人親親之義分寶玉于伯叔之國時庸展覘恐不當如是

一碩布疇齊每戶要訖鈔半兩或一兩二兩

一燒經排門取訖鈔五錢僧道每路不下五十錠

一今次貪人所積贓物不啻數萬錠其實皆爲生民之膏血惟數宜與民休息免絲銀或三年或二年統體受痛不立法不選人無賞罰貪貨財土地取兵取民無制度御臣下法寬而不禮重易進易退百官苟且趨利無貴賤等級職員太冗俸給不足員冗則論議紛紜而事不集俸薄則生理不給而生貪汚以今觀之每一司分莫若減員之半而倍其俸

一卽今銓調之法名存而實亡近年以來賄賂公行所謂緒餘土苴併自廢壞錢多者其職切要其祿厚其官高其

日月經久而不遷轉所用之人無行檢無才能無門閥無
勲勞無智職不責王事之辦集廢墮而不恤部民之冤苦
失職提刑司恬不憚舉無錢者雖負德行才能門閥勲舊
或任滿而再不遷叙或蒞任未半歲一歲無罪替罷亦不
錄用惟僻遠荒邑職不切要者或七八年十年無人交代
然則吏部官可不精選公平廉幹者躬考核簿書內外司
分計若干孰賢孰否孰功孰過孰年老疲軟不勝任孰年
壯精力才幹人人見來歷人人如素知識某司某分當用
幾人文資武資宜幾人某人因某功而陞遷某人因某罪
而降黜使陞遷者知非邀倖廢罷者不敢怨言如此則趨

事赴功得賢日廣

一府州縣司吏所以遷轉者本恐年深作弊自遷轉以來其弊愈深其悞事愈甚何以言之人之所趨惟名與利照得府州縣司俸薄不足以利家辛苦年深不得入流品無利無名復何顧籍不貪污不枉曲何以度日兼人之職專主簿書案牘之首尾公勤才幹者聽從本官及上司呼召指使之不暇安能經理上項所當知之事哉是以問東而不知西問首而不知尾一聽于主案貼書之可否而况貪賄賂殖貨財奉官民避強凌弱庇富虐貧非主案貼書則不能也以此論之反不若不遷之爲愈也居父母之邦粗

有田宅產業賴公門庇廕足以養廉人情物理彼此不能相欺護不親卽故人非豺狼遇事豈不相憫恤案牘出於其手不勞苦而嫻熟知首知尾其蒞於其職每事不敢苟且恐後不能離手豈惟吏人至於職官自循末世避貫遷轉之法亦不免此弊不務擇人止務遷轉甚非良法使爲官爲吏者性果廉平雖居鄉黨亦廉平性果貪曲雖處異鄉亦貪曲避貫如以狼守羊何往而不殘食之也罷遷轉務擇人使鄉里公共推擇俸足以養廉公平遂久則得人流品庶幾簡易而得人不撓法不害民不悞事

一某前任河東按察副使在任別無他能惟不妄拘錢文

入官吏人有罪杖而不罷一事頗異於同僚錢至彼此俱
罪者入官拘收濫官污吏以形勢知術而強取民財今復
入官是何異於濫官污吏之所爲哉後雖有欲訴者則曰
我所以不避官吏之宿怨含怒控告于上司者庶幾得吾
之財耳今復官爲拘管徒取怨官吏反貽後患曷若不申
告之爲愈也吏罪不罷者縣吏革罷而陞州府州府吏革
而陞于省部臺院與其害天下多曷若害一縣之寡害一
縣而得罪猶有巡按官之杖青害天下之大孰問而孰責
之哉

一里正輩不催差抑勒上戶一弓手擅考掠作威福政令

有一言而事舉者不必費辭費力當一一舉行一日不能
書字一萬者不補貼書不能裝卷試案式者不補諸吏不
識文字者不補縣令但犯贓污者品官落職永不叙用不
能騎射者不補縣尉人驗歲月宜有出身親親以惠與民
休息立法擇人射占納租闕草地恩詔罷土功立法租庸
調閱實戶口物力開荒免五年減租稅不任軍役辟舉守
令五年一遷江南立王府革罷諸省宣尉司等不急諸衙
門推排軍力一百戶爲十甲驗力均當買賣土田當立定
制革罷中原不急諸衙門如淘金之類金玉人匠禁斷奢
侈淫麗定立等級聘財喪墓屋宇衣服筵宴程式僧道儒

醫及一切入仕官吏抽分羊馬拘刷牛皮筋角抽分私家竹貨之類皆宜罷去

吏治雜條

一身正無私門無雜人

一詞訟省減推擇謹朴老吏結印寫狀毋受越訴經司縣斷而不服者鈞卷詳度縣斷依法則反坐妄

告人違法則坐官吏

一不投下尙好

一獄無滯囚獄囚起數置一牌而日在几案斷訖則勾抹新添則標錄未斷者細標注緣故曰曰省問

審斷定法

一六房朱銷

曰曰省門觀監斷決增添日銷日附

一鈴束吏人非事故白晝不得出離各房卯酉歷嚴謹如私事公務妨奪明白標附

一承受鑿發委審慎公勤者主之與注銷簿時復相對以賞罰勤惰

一差撥辦集推唱均平勸率怠惰務農者務農雜業者雜業精勤專一

一游手好閑者鄰社舉彈宣限不可不遵毋遲毋速遲則違限太速則二月賣絲五月賣穀矣

一盜賊息無不業之人無外來浮脚之戶無識姓名客寄不成戶單丁之人謹慎勤苦不幸疾病死亡或凶歲不給

者官爲扶持或律助口糧或減免差發母致無賴

一田野開闢荒者五年勿役乃減免雜役

一復逃亡到任便取實在并逃訖數日申部復業者免三年差發無事產官給荒閑地土元拋產業或爲他人所有官爲贖付

一館舍修整具備器皿全酒食美肉菜米麵精緻舖馬肥壯館人勤謹毋捏名頂替

一倉庫完固防慎火燭巡護嚴密

一橋梁以時修葺須要五月一日拆八月一日搭

一詞狀置簿即日便行毋落吏手

一衙衢巷陌潔淨無穢

一牢禁嚴固潔淨溫涼

一更漏分明依時夜巡如法

一弓兵有職分里正人毋得侵占

一公門人無故不得下村

一風俗淳儉婚姻喪祭一一從儉祈禱義社即皆任罷到

任省諭

一強宗大姓侵凌細民體察禁治

一減主案貼書主案一貼書二三餘並削去

一循分母惡忌母妄下當行者即行部符不便于民者當

折申卽申母便行下州縣

一印章朱語正貼無朱語者不得題判判署官或有照料不及雖更題判若無朱語者職印不得使印

一不倒題日月不押虛催無益于事徒使吏人欺怠

一本命刑禁曰當直吏人明書于小銀牌面置在几案曰今日某事某事

一和好鄰境凡有急速使臣則事情差坐馬人預相報知
一六房吏弊當周知其情毋爲所賣舖兵有人應役頻勾
正身本是舖兵守把城池別無巡哨攻戰管軍官爲本人
會手藝不放交代甚爲艱苦近年以來軍人分撥奇零輾

轉別隸部位新管官並無簿籍或有逃亡事故不知鄉貫及戶頭官名公文追勾不無差錯以致吏人受賄作奸

一文字往來逗遛不發亦有軍人小心謹慎避怕罪累重併應役此段前說備細言之合申省部密院詳察

一問獄以情筆楚之下何求不得弓手及尉司官吏畏避踰限罰責又本性殘暴殘忍率多執平人妄恣捶撻苦楚捏合指示虛令招認獄問初情如此難以推究今後尉司獲賊毋得監禁稽留擅自筆楚便當縣令以次公廳羣問得實止于縣司牢禁申解所屬有司推問之法止問今次所犯使首尾情實若犯人因推問其間情辭別有可疑說

出他事者亦合鞠問如無此情節不得曲加凌虐轉生餘事

一工本管諸色當面置簿籍紀錄戶丁標注應役不應役遇有造作輪番斟酌勾喚毋使吏人遍行騷擾作奸受賄虛奪功力

一戶差發夫役不均在家申逃每于逃戶處歛訖差發却于見在戶科攤

拆獄雜條

體認所爭者何事人命盜竊錢債婚姻良賤

鬪毆明察詳審元訴人辭理與事情有無相應如不相

應且放復說過俾再三復說或差或否理短者折之情隱者鈎之言語便利者勿便以爲是蹇納者勿便以爲非庸受之訴世俗所謂情理切害者勿遽先入于心察言觀色詳情慮事不出乎理理明則情不能逃

引問被論人明告以被論之事令一一縷細抵對時曲直真僞自見一鈎一距必窮盡其情而後已大抵元告被論辭固無有不差因所差處互相詳察亦有辨明

每事皆有根底旁証來歷情由當從實處一一推究干証勸和人最爲緊切君子善人畏避官司中間別無偏向者其辭簡直明白或關親戚或圖錢物酒食或挾讐怨或遊

形勢或受囑托有一于此不無偏向辭理逆順輕重不可不察與元告事飾辭增減者有之與被論人辭理或排或助者有之聽訟者若便止憑干証不無冤枉不憑干証無所依據凡引干証人便先窮問與元告被論人有無親戚故舊錢物交往因何兩家指爲干証則情過半矣干証情實見則事可立決

仲弓問政子曰先有司不先有司則不惟越訴事繁吏人因緣爲姦抑實有不可隔越而問者又曰無情者不得盡其辭若無情之辭便爲受理雖有明斷之材衙門必不能清簡二者當從古人凡人告狀官人當先熟讀其文有理

無理寫狀人中間有無潤飾亦可見其過半當先引原告人當廳口說所告是理一一與狀文相對同則憑狀鞫問不同則便引寫狀人與告狀人對辭若有與口辭增減便決寫狀人亦減止無情妄告之一端耳上失其道民散久矣如得其情則哀矜而勿喜民情與政通先知時政然後知民情夏尚忠殷尚質周尚文至于後世政治雖不及古豈無所尚乎所尚者民亦尚之究其原之失知其源之差不可誣也無或偏聽與獄之兩辭

五聽之法當熟知言察情理明鍊事四者胷中了然且無一偏之喜怒雖百冗坳集于前皆可談笑而決何必疲精

樊神怒罵揮斥榜掠捶楚然後爲得也若夫情見勢屈而不可得先之以正言申之以感悟無不從者柔能勝剛弱能勝強溫言可以化人理到之辭不可不諷聽獄之法靜則明明則百姦不能逃其形切忌躁急躁急則已心先亂譬如撓水搖鏡焉能鑑物哉細民之所爭若無異事不過婚姻良賤錢債土田戶口鬪毆姦盜而已此皆縣令之職令賢則必不至于上告至府至府而不能決決不能服人良可恥也素餐之誚孰大於是當置狀簿詞一冊便給縫印府官押訖每日新狀當直司吏隨卽當廳附籍便令承發司布散合該人吏旣畢隨手朱書吏人姓名於隨狀條

下次日便令覆說無理者無理者便退於元告人有理者
施行但凡州縣可決者隨卽批送必不可決者狀尾批令
自勾此亦減吏權而除冤滯也府官五日十日一誚照

十月一日務開三月一日務停首尾一百五十日每月先
除訖刑禁假日只日計二十日又除訖冬節年節前後各
一日計六日兩月一小盡除訖三日立春節除訖一日進
年節表一日乙亥日三日若遇二月清明節又除訖三日
計二十七日中間或遇同仕上官下任吉凶慶弔迎送上
司使客大約又除訖十餘日總計五十日餘外斷決詞訟
者止有一百日或遇兩衙門約會相關或干證不圓或勘

會不至或吏人事故專按疾病上司經兩吏人手又虛訖

十餘日中間止有八九十日理問辭訟又以監視造作勸

農防送遞運府州追勾按察司差委得問民訟多不過五

六十日聰明疏通公勤廉幹者能決幾事若賦性愚鈍稟

心私狗反為奸吏愚弄文字逗遛倏忽之間又復務停所

以有十年八九年不決之事此蓋為十月一日興辭到官

者言也若或正月二月才方告狀務停限更甚迫促推原

務停之政本恐妨農不知墮姦吏倚法舞文之巧計以此

觀之不若不立務停之限止取稽遲不公之罪必不敢至

於數年之不決今得品官得代計在任月日經手事久不

決者降黜責罰得代之日按無不決之事者陞遷褒美
不遇無法而亂不見聖人之治功不值叔世之苟且而徒
法不知聖人之防患而慮遠始以田制言之三代經野有
法不惟務本地著而民和至于一切紛亂詞訟皆無自起
自經野無法田不隸官豪強者得以兼併游手者得貨賣
以離鄉輕家無父母之邦無墳廬之戀日且一日千年田
換八百主交易若是之煩因推收稅石之冗官吏姦蔽出
入挑攪獄訟萬端繁文僞案動若牛腰一語抵官十年不
絕兩家爭田連村受禍廢奪農時破壞產業視骨肉爲仇
讐化鄉里爲盜賊飲恨銜冤死莫能解一鄉一縣雖素號

淳厚者亦皆變爲姦欺詭頑嚚健詐造契券破作佐證府
州縣司惟利是視以曲爲直以非爲是上至臺省濁亂猶
甚吁人之積怨含怒與日俱深良可寒心官府風俗敗壞
至此刀筆賤吏猶以刻剝徵求飲聚貨殖爲忠勤簿書期
會爲急務爲明敏此乃田訟之一端也至於叙差之不均
軍旅驛站之偏見在戶代當逃戶差發之冤抑酒醋稅課
程之增額利歸于姦貪之手禍及于無告之小民刑獄之
淹滯畧不詢問赦恩之頻數縱放凶殘內外百官賢不肖
混淆幹局廉潔者招謗惹禍貪污委靡者歲得美除出條
欵則虛文嚴密責實效則百不一舉軍籍民籍點竄改抹

畧不可憑錢穀出入漫不照筭官不知法吏不識字身爲
軍卒而不識弓矢名隸工匠而無一器俱僧道則有妻有
妾飲酒食肉趨無厭鑿藥者不知方論素無學術狠忍殺
人中選儒人不經不史不文不詩不修身齊家渙忍無恥
冒虛名而求美官尚口舌而無實學標置自高致行同市
井上下無正法是非無公議奸醜無明鏡重輕無權衡曲
直無繩墨紛絲沸羹莫之分辨具曰予聖孰知烏之雌雄
唯此時爲然

論有司不立常平權衡高下一出于編民

物有餘則賤不足則貴固物之情也然而乘時傲利賤入

而貴出亦市井之薄俗近歲農民亦爲壟斷之態寧取倍
息之稱而買穀麥欲乘其雨不時降新不接舊物價爲之
湧貴而售也是以今晨物價若干日夕物價若干朝貴暮
賤朝賤暮貴若翻覆手乘其逐未者口求升合而素無蓄
積耳有司略不介意坐視其紛紛無定偷薄姦蔽日甚一
日然則古常平權衡可不設歟

丁糧地糧詳文

近爲民戶張忠買到軍戶王贊地二頃五十畝又令張忠
重納重稅事申部除豁不惟不准五致符下本路問罪今
來若不再行申呈地一也而曰軍地民地稅糧一也而曰

丁糧地糧是蓋因人以立名因名以責實因人以推取義
例甚明當丁稅者不納地稅當地稅者不納丁稅自立此
格例以來未有併當重當者也近年以來破壞格例既納
丁糧因買得稅之地而併當地稅或地稅之家買得丁糧
之地而併納丁糧如此重併府司屢申終不開除反致取
招問罪不惟案牘繁亂名實混淆軍民重併使國家號令
不一前後失信省部見小利而不究大體以瑣屑俗吏之
言爲可聽俗吏不惟不知理義且如一話一言先自差失
何以言之所以名曰丁糧地糧者地隨人變非人隨地變
也今日隨地推收先自先言合曰丁糧地糧隨人推收則

借之與民石得八斗又以農忙無力搬取賤取其本而棄之如糞上秋成徵還加倍不能償是國家常稅本該一石新舊併徵計以加耗而併納三石矣其餘爲官倉船戶失陷者不可勝數事發到官枷紐連歲無追徵者省鄙明見此弊畧不置議愚謂倉官各選品官廉慎幹局者充增餘失陷明立賞罰以每歲所着錢或減租稅之半折納交鈔以二頃田徧置廩房實爲便當

匹夫歲費

父母妻子身計家五口人日食米一升是周歲食粟三十石布帛各人歲二端計十端絮二斤計十斤鹽醢醎油

一切雜費畧與食粟相當百畝之田所出僅不能贍又輸
官者絲絹包銀稅糧酒醋課俸鈔之類農家別無所出皆
出于百畝所收之子粒好收則七八十石薄收則不及其
半欲無凍餒得乎又爲以上三四十家不耕而食者取之
所以公私倉廩皆無餘蓄矣

試典史策問

即今司縣司吏起身寒微素無祖考遺留產業貲物本身
不會士農工商止仰月俸養廉然而食則梁肉衣則羅紈
駟馬奴僕與品官無異妻妾首飾金珠衣服金錦文繡與
帝婁富室無異所居之室高堂華屋不知所得從何而來

假有編民游手好閑頻飲酒食肉必爲隣人弓手里正所
疑此人不務實作活每日如此受用伺候刺探得錢因由
必得其姦司縣司吏奢華如此畧無一人窮究詰問反致
當路權要保舉廉慎未委虛的仰一一答問

古今設官置吏選人材爲官者必須通曉政事長于判
斷推勘刑名詞訟使民無冤抑推排差役賦稅貧富均平
六事皆辦百務具舉斯爲稱職爲吏者案牘明敏刑名嫻
熟無稽遲無違錯斯爲稱職不稱職則自有彈舉之有司
不才者合退罷則退罷今皆不然取勘歷任月日動皆二
三十年試以才能則百問而百不知豈有官吏人不識字

不解書筭不通刑名案牘止以勾當年深縣升之州州升之府府升之部部升之臺院都省出職爲品官當要職外任則承流宣化內則參決大政綱領羣縣取人如此是邪非邪爲官爲吏不自慙猶懷悵怨職小官卑以爲虧已事當何如仰一答問

紫山大全集卷二十四

三怡堂叢書

元 胡祇遘 撰

語錄

中庸一編子思子爲人之不知所以爲人不自貴重而作也天生萬物人爲最靈得天之全能循其天之命我全其性之良能明善正心修身非法不言非道不行夫婦別父子親兄弟睦長幼序朋友信自天子至於庶人盡其職分之所當爲不少闕不踰越貧富貴賤順受其正如是而已偏爲氣稟偏駁而不純全昏濁而不清明或過或不及而失中故聖人以身教之又擇其能全天德者爲之師至於

一家之內則父爲子師夫爲婦師兄爲弟師長爲幼師此
自然之職分也以其間有頑父嚚母不能爲子弟之師故
使之家有塾以至國有學使人人孝悌忠信循序而和則
天地位萬物育所以刑措而不用四海猶一家篤恭而天
下平矣

始言天以全德付人萬物皆備於我不可不存養省察中
言聖人法天立功立事終言聖功神化卒肖天地而後已
天命性道教中和庸忠恕鬼神孝知仁勇誠明聰明睿知
寬裕溫柔發強剛毅齋莊中正文理密察溥博淵泉敬明
勸威不大聲色無聲無臭

中庸一書中爲人本和爲萬殊萬殊所以行其中也無所
乖戾發而中節曰和中節者時中也中節則和和者中之
功效也庸者平常不易也惟中則能如是一有偏倚過不
及雖欲暫而不可況今日如是明日如是久久平常而不
易者也庸者中之立也久也誠者實其中也明者中之鑑
也人能中立則上下四方是非邪正情僞賢不肖莫能逃
其鑑照推而至於參天地贊化育如堯舜文武周公孔子
此中之聖功神化之極致皇極之全體也故孔子曰不得
中行而與之孟子從而解之孔子豈不欲中道哉不可必
得故思其次也

中庸一篇天人惟一本非二物以天理統人事明天理聖人則合乎天也大賢君子則克己復禮求同乎天也小人則不知而背乎天也天能賦與而不能言聖人代天理物心得躬行以立教垂訓使天下之人皆合乎天得自然之性行當然之道實固有之德亦若生知安行成已成物擴充推極養而無害聖功神化以至無聲無臭與天同德而後已

天行大中至正停停當當無餘無欠無妄僞無乍作遽息無過不及無惡無凶無昏蔽無私無我無固滯不通無不仁不義無禮無智無乖戾不和周圓具備之理付與於人

人反其天不能全其天而入於邪惡故子思明善消惡欲
人人之復其天也

中庸一篇只篇首三句命性道教四字該括已盡以後三
十三章乃四字之發明子思子恐後學之不擴充以至其
極故不免實之以前聖嘉言善行完備四字之體用耳至
於伏羲文王周孔之於易諄諄切切丁寧反復縷陳數說
恐後人之不能明了耳至於大學語孟詩書春秋亦此意
也

中庸綱領命性道教中庸和知仁勇忠恕鬼神孝郊社禘
嘗誠聰明睿知臨寬裕溫柔容發強剛毅執齋莊中正敬

文理密察別溥博淵泉尊德性道問學致廣大盡精微極

高明道中庸溫故知新敦厚崇禮肫肫其仁淵淵其淵浩

浩其天

人之學道貴知原委貴得體用貴切己貴識權知是四者

由博以求約萬而一一而萬有綱有目本末不紊則可以

達德入道孔子沒周道凌夷民不興行賢智者矢之太過

愚不肖者失之不及不知道之大原出於天備於性成於

我以口耳為學以計術為智才能為賢子思作為此篇首

言性命性道教皆出乎天人肖天地以生當肖天地而成

已成物毋墜天之降寶命聖人則不惟如是而已雖天地

萬物賴聖人以位以育所以能如是者不在乎他循其性之自然適乎中而已性之所有者五接於人倫則爲五典非知足以知仁足以守勇足以行誠足以成則不全其天復其性矣故以舜之知顏子之仁子路之勇實之繼以舜文王武王周公受天之命全天之至性行天之大道代天而立教四聖人者功及於一時故終之以孔子雖不得天位而立德立言垂教立功及於萬世集四聖爲大成又有賢于四聖聖功神化天地造化之所不可及者孔子爲之輔相裁成無聲無臭與天同德然則子思之言豈不昭昭矣乎天人果爲一乎人之學道果能出於此乎

靜能不偏不倚而大本立大本立則天地位故動能中節而達道行達道行則萬物育立之正謂之大本行之通謂之達道

道也者不可須臾離也子曰誰能出不由戶何莫由斯道也人無貴賤賢愚萬古一日萬人一人出必由戶戶即當出入之正路也人倫自有正路自有門戶人而不由道出不由戶也教衰俗惡可哀也哉

戒慎乎其所不睹恐懼乎其所不聞耳目之所及不過百步已不詳審寡聞淺見日用當行者不著不察况耳目之所不見不聞者乎道之體用大包天地細入微塵無所不

在可不戒慎恐懼乎視於無形聽於無聲賢者尙爾矧庸人乎此則當知道之無外廣見聞而遠視聽慎獨則當知道之無內一毫私邪不萌於心也

暗室屋漏謂之隱念慮萌動之初謂之微孟子曰作於其心害於其事作於其事害於其政邵康節曰思慮一起鬼神已知此子思所以慎其獨也

民鮮能久矣何也惟皇上帝降衷於下民雖於五常萬善反身而誠其氣質之偏賢者知者常失之過愚不肖者常失於不及或乍作而遽息日月至焉不能恒久而不易是所以民鮮久矣譬如飲食之美惡人皆知之亦有名嗜一

味之偏不知酸苦甘辛鹹淡得中之正味况道之中庸乎
故子思著中庸一書使人知道之體中而已道之用庸而
已庸者平常恒久而不可易和在其中矣中之一字大矣
廣矣天地萬物莫不在是一寒一暑中也一陰一陽中也
日往則月來月往則日來中也五行相生相勝中也一晝
一夜中也是所以謂之不偏也不倚也無過也無不及也
大本之所以立也今日如是明日如是今月今歲如是至
於萬萬歲恒久不改易而如是是所以謂之庸也達道之
所以行也所謂不易之定理也非中則不能庸非庸則中
不立是謂大道之體用相生而相助也在天下則京師爲

中帝王爲中在一人則心爲中在一草木則幹爲中帝王
中天下而立定四海之民建中和之極心爲人身之中建
立萬事酬酢萬變幹爲一草木之中則下植根本上達枝
葉故一中立而萬殊生過者不及者偏者倚者東西南北
上下廉隅皆歸極焉皆會極焉是以能無窮而不易

五常萬善或過或不及或不能平安是所謂不合乎中庸
然則孔子之時周道雖衰一時風俗民行恆性良德未盡
斷喪但失於過不及不常之差耳未若後世不孝不弟不
仁不義不忠不信全失其良心者也觀聖人嘆辭可以見

世變

子曰人皆曰予知至而莫之知避也存心養性接物處事
或過或不及或不恒久已悖物忤違錯乖戾內而此心外
而庶類不位不育小則起爭訟大則犯義犯刑然則不能
中庸者非罟獲陷阱而何故曰致中和天地位焉萬物育
焉或失或不能盡則反是遂至放辟邪侈無不爲已陷罪
而受刑法不可宥此司徒職天序有典所以不得不敦也
世教旣衰民不興行故曰如得其情則哀矜而勿喜

道不遠人者身外無道身即道之體道即身之用也有耳
目口鼻之體便有視聽言動之用視聽言動之則視聽言
動之理旣有此身便有父子兄弟夫婦長幼朋友君臣之

倫類便各有自然之理當爲之職分當行之路我身所具之理人亦具之物亦具之本不相遠人所以去道之遠者害於有我形氣之私不忠不恕故違道日遠已所欲者人亦欲之已所惡者人亦惡之知人與己同忠以盡己恕以及人則近道矣下文君子之道四以責人之心責己則盡道也

德性之自然何遠之有以其不循自然有爲之之心故愈爲而愈遠故曰道者自然之理不可以爲遠

以人治人改而止改訓移移手中所執之柯之則於所伐之柯則能事畢矣旣未能如堯舜之性之則當如湯武之

身之反之人能以人之固有之善而治其不善則亦移而已矣故曰以人治人改而止

聖人以高遠自負觀此謙退之辭意深警學者舍切近而慕高遠躐等凌節便欲升高陟遐而不知自下自邇之不可越也

無憂者其唯文王乎舜以不順於頑父嚚母不信於敖弟貴爲天子富有四海而不足以解憂文王處賢父之下居賢嗣之上故無憂

思修身至不可以不知天孟子曰不得乎親不可以爲人不順乎親不可以爲子人之所以爲人爲形於父母愛性

命于天

勸賢勸親親勸大臣勸士勸百姓勸百工勸之爲義非諄諄喋喋家訓戶曉蓋使人感恩戴德奮激勉勵各盡其職也冰炭不同處讒諂之小人天淫之美女其志在於淫縱自恣所疾惡者有德之士投間抵隙獲明夷之心爲正人之害人君誠能斥去讒人疎遠女色不貴奇珍異貨以德爲貴則天下之士皆悅而願仕於朝矣

來百工來者日省視其勞苦月考驗其巧拙餼廩溫厚與所作之事相稱感結人心使人人慕悅傾心竭力爭呈效其技能是之謂來近世以來疲憊困乏而不知所省工者

不賞拙者不罰凍餒其妻子不逃遁遠去則咨嗟怨望欺詐疾矣

自誠明謂之性自明誠謂之教誠則明矣明則誠矣聖人生知安行便能實見實知實有其天德故自誠而明大賢已下不能齊聖必當推致委曲以盡其誠委曲有矯揉勉強克勝之謂也一念一言一行凡有不誠者淺則推致之深則委曲矯揉之自怨自艾自懲自創久則亦能誠矣感悟之深力變之篤遂有形著明動變化之效聖賢同歸矣上章天下至誠者聖人也不勉而中不思而得自然誠實降聖人一等不能性之必當擴充推致矯揉曲折凡有不

誠者力反乎誠必至無一念一事之不誠固執凝定已如自然故能發見乎外驗之行事誠不可揜顯若昭明矣中人所稟不能渾全從其性善之一偏推而致之觸類而長漸可以至乎純顏子所偏者仁故由仁而成德造道以致於聖曾子由孝而入子路由勇而入皆致曲也

尊德性而道問學天地之性仁爲貴夫仁天之尊爵也人有貴於己者弗思耳矣爲人而不自貴重自暴自棄自污自賤悖德賊仁不才不肖是負天地之厚我也旣知我有如是之德性可不自貴自重恭敬奉持惟恐失墜乎然而當求如何行善而有得於心如何作爲行事而有得於

身如何可以全此心之德而不至於不仁不智無禮無義
行有不得先反求諸心後請教於父兄師友不知者敬問
之不能者博學之孔子曰我非生而知之者好古敏以求
之者也欲尊德性必先從事於問學不問不學則不知不
能雖曰尊德性亦妄自尊大妄自貴重徒為一驕傲木偶
人耳二者修德凝道之大端致廣大心存而盡精微致知廣大
配天地然必自精微細密積日累功擴而充之推而極之
而後能之故曰切問而近思又曰守約而施博

極高明心存而道中庸

致知

與日月合其明求能如是必當從

事於不偏不倚無過不及恆久平常而不易其操守言顧

行行顧言然後庶幾極乎高明

敦厚

存心以崇禮

知人生性質本厚因物有遷知自厚而著

力以厚然質勝文則朴野庸鄙故博學於禮文以增崇其厚德文質彬彬然後君子

天以善與我得之而勿失故謂之德天以善生我我生生而不絕不悖故謂之性德性者物莫能全而人受之是之謂良貴尊爵當自貴重故曰尊德性然人非聖不能生知必從學問而後知故當道問學人配天地而三德如天地之廣大則可溥博如天淵泉如淵天行健君子以自強不息純亦不已地勢坤君子以厚德載物法效天地日復一

日推而至其極故曰致廣大廣大者精微之極故曰盡精
微懸象高明無踰乎日月然其行也無過不及今歲如是
千萬歲如是可不謂中歟常歟故曰極高明而道中庸故
歲已去新歲復來故當溫故以知新體立用行質完文具
故當敦厚以崇禮

知天地之化育夫焉有所倚如知縣知州知府知事之知
以配天助化育爲己任功用在我何有倚賴中天下而立
定四海之民正謂此也
行有餘力則以學文詩書六藝之所載亦不外是數者但
先能力行或過或不及躬行雖篤而中有未悟然後學文

以爲龜鑑準繩以適其中而已不力行而先學文徒能騰口說而已

民德歸厚矣子之於父母厚之至者不學而能者也於所厚者薄無所不薄也然則後世人君以日易月化行於上俗成於下天下之人視君長何有哉

不學則心身茫然不知所立自十五志學念念不厭習熟倣效前賢之言行又十五年之久所學有諸已挺然植立而不遷徙立心有恒處身有道矣

溫故而知新涵泳乎其所已知理義則日知其未知既得之而時習之月無

忘其所已能未得者不可不知故日知其所無尋繹舊聞

每有新得勿謂已能而不溫一事未知心爲未盡知爲未致故君子耻之故新不可不知

道者理也路也一事自有一理一事自有當行之路不合正理不由當行之路是之謂畔然則何由而不至於畔經事多窮理明有要約以持守則自合乎道固當博文約禮二者廢一不可博而不守約則無綱領守約而不博如無一錢可窈何以知道欲知父母君臣夫婦昆弟朋友之道則博觀古人人倫嘉言善行之文而揆之以禮則合遵而行之不至於畔

以博施濟衆言仁非惟堯舜病其不足雖天地亦不能足

旱乾水溢疾病灾疫山崩水涸皆是也

庸人以口體爲重心性爲輕蔬水苦口體富貴悅口體故樂富貴而悲貧賤苟得富貴不義不恤也得之既不義其能安且久乎心性庸得乎養其大體爲大人而况聖人乎子曰飯蔬食飲水曲肱而枕之樂亦在其中矣不義而富且貴於我如浮雲顏子一簞食一瓢飲在陋巷人不堪其憂回也不改其樂子曰賢哉回也孔顏之所樂於此槩可見矣世之人樂富貴而悲貧賤所樂者口體之樂耳孟子曰禮義之悅我心猶芻豢之悅我口又曰仰不愧於天俯不作於人二樂也又曰舜之飯糗茹草也若將終身焉及

其爲天子也被袵衣鼓琴二女果若固有之君子所性雖
大行不加窮居不損焉分定故也子思子曰素貧賤行乎
貧賤故君子無入而不自得焉口體之樂肥甘輕煖二者
而已心思之樂所樂豈有旣哉濂溪每令門人尋孔顏所
樂者何事以愚觀之顏子之所樂者欲罷不能也孔子之
所樂者天生德於予也無往而不樂也豈止一二事乎
游於藝游由同用藝當作義藝乃傳寫之誤以藝義音相
近故也孟子曰居仁由義大人之事備矣子曰吾不試故
藝君子多乎哉不多也藝非聖人之所貴又非可以配乎
道德仁也子曰立人之道曰仁與義道德仁義四者不可

相離故韓文公曰仁與義爲定名道與德爲虛位心一身之至志又心之至用也不志於道則有是物而不知則也何以率性心無所至不知心之所以爲心之理與木石何異焉惟能先明心之所以爲心之理自然當行之路率性而行而得於心是之謂德理爲我有脚踐實地有所憑據執守故曰志於道據於德然而仁義者又道德之實居仁由義則不悖德不畔道矣

志道據德依仁游藝志道則循理得路心無邪慝據德則心有所得身有憑藉止其所矣依仁則至公無私無非天理之流行矣游藝則卽藝明理小大交相養矣

子於是日哭則不歌親戚朋友之死喪輕重厚薄固爲有
間其於遭變故則一也我以親戚朋友而哭之是日之內
宜如何哉禮曰隣有喪春不相里有殯不巷歌方哭而遽
有歡心豈性情之正也哉

孔子之愛顏子愛其語之而不惰者於吾言無所不說顏
子之愛敬聖人感佩其循循善誘使人欲罷而不能在他
人則便不能然識其小而不識其大見其淺粗而不見其
精微或喜聖人之博或慕聖人之言辭文章譬諸蒙天地
生成之恩而止知其覆載受日月之照臨而止荷其光明
聖人憫其狃于見聞之得而不求其充塞光輝自得大成

之趣故曰三欲無言以感悟子貢若于顏子不必言此子
貢果不悟而發小子何述之對聖人恐其學者以子貢之
言爲然學止於言語文辭而已故直指明示而告之曰天
何言哉四時行百物生非聖人不能如此訓人情乎子貢
之終不悟也聖人之學同天也如是故曰雨風露雷無非
教也聖人動靜語默無非至訓無非可法如學者窺伺體
認奚必以口舌爲哉

子曰可與共學未可與適道可與適道未可與立可與立
未可與權適道悟說自得也道卽理也雖能悟說其理未
敢必其挺然持守不肯畔也故曰未可與立雖能挺然卓

立多固執而不通不能隨時而取中故曰未可與權人有志於學可與之共然其智識才能不逮其志亦不能與之得路而進執德不宏信道不篤中道而畫半途而背畔是未可與卓然立而不變就能堅定不變又多固執而不通方故未可與權然則學道豈易能哉孔子於齊衰冕衣裳失明之人禮貌若是惟顏子曰擊道存見微知著見聖人之心德發於威儀動作不覺失聲而嘆曰敬而仰之則崇高廣大包天地而無外致力研求其底裏其小無內堅確而莫能破窮其首則已在吾之前不見其首究其尾則忽在吾之後不盡見其尾夫子之盛德如是哉及其施教俯

隨人才之小大高下先傳示之以前言徃行禮樂刑政與夫天文地理一物一事之光華昭著者使我因外以求內因用以求體因流以討原因末以尋本又恐我不能知萬殊之一體故要約我以天理之自然使知不能不如是之理必至一貫而後已聖人於我恩德勤懇如是我勉勵努力追逐企及而恨其力之微才欲少止則味濃厚而不能捨故不惜我之心力竭盡無餘得我意少坐而後進見其卓然峻絕而不可攀躋此顏子已至於大而求化之歟道無不存無適非道費而隱語大天下莫能載語小天下莫能破焉飛戾天魚躍于淵言其上下察也顏子見道如此

故發此歎因言夫子善誘我先博我以文使我卽物窮理而致吾之知後約我以禮使我收功守約克去己私復全天理學道至此自得居安資深欲罷而自不已盡我之力仰而視之巍巍乎無有邊際峻極于天不可以階升無由得從此顏子百尺竿頭更進一步之勇也必至於大而化聖而不可知而後已

今之琴瑟古之鄭衛此樂音之與鼓通也由之瑟奚爲于丘之門此氣志之形于物也故古之君子燕居養德假物之善鳴者以宣道純粹和平之氣今之君子隨俗進技以嫵媚娃淫之欲快耳而稱口噫其于樂以成德也不亦遠

乎

子張問士何如斯可謂之達矣至在家必達言行中節合
理不違忤於物所向皆通無有滯礙是之謂達子張以虛
譽聞通於遠近爲達聖人知其情故爲之問果以聞對子
曰言忠信行篤敬雖蠻貊之邦行矣言不忠信行不篤敬
雖州里行乎哉

樊遲請學稼圃聖人以好禮義信答之富哉言乎上好禮
使臣以禮御衆以禮以貴下賤大得民心上和下睦人非
禽犢安得不以敬愛報上上好義舉措合宜小大無過舉
先愜衆望安得不悅服上好信上下貴賤誠實交孚信如

天地四時下安得不以情實事上四海之民敬愛如父母
悅服如神明孚信如天地將見如獸走墻如蟻慕羶如魚
聚淵如鳥歸林有人此有土有土此有財倉廩府庫充實
富藏天子尊居民上咸知禮義而王道大人之事備矣何
必區區以百畝不易爲憂哉

仕而優則學此句當在學而優則仕之後書曰學古入官
政乃不迷又曰念終始典于學以此觀之學也者學爲仕
也故孔子以子路有民人有社稷何必讀書然後爲學爲
佞世人要好文章不過效學前人陳言工字琢句鋪叙排
布首尾腹心成章而已要優於政事不過廣覽前人陳跡

效顰而已韓子曰不得其心而逐其跡吾未見其能旭也
真知言哉朱文公亦謂後人學騷譬如無疾而呻吟正謂
此也

湯之於伊尹學焉而後臣之故不勞而王古之王者之於
大臣有師事之禮文王之於呂尙命曰太公亦此意也不
至齊桓之于管仲漢明帝之於桓榮師禮有在二君之德
業方之殷周固不足言方之近世君人者求爲齊桓漢明
之罪人不可得也中庸之九經曰敬大臣體羣臣也漢高
帝慢而侮人猶曰吾不如子房吾不如蕭何吾不如韓信
推誠嘆服字子房而不名失蕭何如左右手拜韓信以壇

載使高帝若知學又豈止此而已乎厥後賈誼以漢於功臣少恩禮正救明辨大以爲非宜以武帝之強雄嚴威整冠汲黯豈非君臣之禮之不可失也聖如陶虞以君爲元首臣爲股肱耳目孜孜求助如恐不及者埋勢然也降及叔世君尊如天視臣如地君以郎主自處呼臣爲奴婢爲大臣者洪忍亡耻處已以臺僕犬馬而不羞也嗚呼朝廷風俗之本禮樂教化之源今也至于上驕怠而自聖下頑鈍而無耻欲求夫庶事康百工熙親若同躬義若父子不亦難乎甚可畏也余讀商書見高宗之於傳說待之如砥礪舟楫霖雨麴蘖鹽梅譬如百工之於利器斯須而不可

舍也親之如股肱耳目必仰以成身也敬之如師保惟恐其棄已而不言也傳說之於高宗祇若對揚告之以法天謹言慎行賞罰用人之明事事具備遠小人儉祭祀終之以遜志敏學道積于身德修罔覺君益聖臣益恭至嗣成湯而不祧踵伊尹而配饗不亦宜乎而又載之於書列二典三謨湯誓湯誥之後流芳萬世永久無窮使後世君臣取法之不假慕古之士百讀而不能已然則聖人定書之旨豈其微哉

萬善在我知之非艱擴充惟難能暫而不能久見近而不能遠舉小以遺大窮明以昧幽是皆不能擴充故也展引

推托之謂擴盈滿塞實之謂充故孟子以人能充無穿窬之心而義不可勝用人能充無欲害人之心而仁不可勝用所以不能擴充者天理才明即爲人欲間斷山徑茅塞之喻豈不昭然易曉哉九層之臺一簣之積也千里之路一步之積也合抱之木毫釭之積也然則大者小之積遠者近之積幽者明之反死者生之復惡者善之悖消長對待一而二二而一故君子貴乎積學積德積行尙志尙友故孟子曰可欲之謂善有諸己之謂信充實之謂美充實而有光輝之謂大大而化之之謂聖聖而不可知之之謂

神

孟子七篇皆於人之良心發見處開導引掖若火始然而發之使明若泉始出而決之使行欲人自不能已推擴充滿以至於爲堯舜深得孔子循循善誘之法若使學者苟能循序而進推救赤子入井惻隱之心事事如此而仁不可勝用矣知好色好貨好勇一出於義理之正而不陷於人欲血氣之私存養夜氣培植朝聽晝訪之功以集義之直養浩然之氣必至於充塞天地而後已知舜跖之分只在義利之間而已知人性之本善不染乎人欲之惡知堯舜性之之真五伯假之之僞真則公僞則私知伯夷隘柳下惠不恭折衷於孔子之時知天爵之良貴居廣居立正

位行大道晉楚趙孟失其富貴知正己以正人窮則獨行
達則兼善凡孟子一話一言皆與論語詩書易春秋相合
互相發明如是則安有學之不進者歟

朱震泥象數盡易之變見伏互體世應至於再至於三反
覆展轉變易究竟有不能通不相符者至如乾卦六爻周
公文辭各各分明各說一爻之義朱震取象不合揉亂錯
雜而取故混雜交互而說反與爻辭相背戾且如說恆大
象既以恆自震三變九三立而不易於爻辭初六復曰初
本泰之六四成巽九出六入有陰陽相求之象不知恆卦
果自何卦而來觀震之解易因辭以求象卦辭大象辭爻

辭既不一故展轉取象而亦不一

易曰君子居其室出其言善則千里之外應之出其言不善則千里之外違之況其邇者乎以理觀之以一氣通之奚啻千里哉放四海際六合窮天地而準故機心發而鷗遠至誠可以貫金石不可誣也簫韶作而鳳儀春秋成而麟至豈不昭昭矣乎外物之來趨同氣也外賓之來從主人之命也故曰和氣致祥乖氣致異以類而應也

天體周匝三百六十五度四分度之一天行健日匝過一度故三百六十日爲一歲以六日之零與日月會每二十日過半相會又餘六日計一十二日爲閏五歲則再閏

以五歲總而計之是一歲三百六十六日矣氣機同流無
斯須之或息亦無斯須之不變故無斯須之同以大率分
之則爲春夏秋冬溫熱涼寒生長收藏更以大率言之則
陰陽二氣耳更以大總言之則一氣之升降往來耳進退
闢耳細分之則晝夜十二時百刻細縕蒸化積而成歲
故五日爲一候三候爲一氣六氣爲一時四時爲一歲故
養生者於調氣呼吸起居寤寐一動一靜不敢過偏焉呼
多吸少言語叫笑過多則氣耗散而衰損吸多呼少則氣
壅滯而不流行動靜視聽亦然至於醫書所說五運六氣
六味和平則生人淫邪則病物是又不可不知也

一陰一陽理之自然無少偏勝氣之常也氣之反常則爲
滯邪勝復或以十年一紀甲子一周大數較之終亦均停
竟不偏勝故曰其進銳者其退速甚愛必大費深藏必厚
亡氣數之不能不爾也凡民所見淺近既不觀物又不明
理見得而不見失欲速而不務久知進而不知退故曰欲
速則不達見小利則大事不成貨悖而入者亦悖而出言
悖而出者亦悖而入又曰原始反終故知死生之說

易中何故以陽爲君子陰爲小人乾陽物也乾道成男坤
陰物也坤道成女此二氣之良能晝爲陽夜爲陰春夏爲
陽秋冬爲陰晝明而夜暗春夏發生長養秋冬斂縮峭刻

春夏爲仁禮秋冬爲義刑小人女子稟受晦昧峭刻得陰
氣多不能不爾故二氣分爲五行人稟二五之精故三命
家以年月日時之支干演五行之性情甲乙木多者仁丙
丁火多者禮戊己土多者信庚辛金多者義壬癸水多者
智亦易之義也萬物一五行也五行一陰陽也陰陽一動
靜也所謂靜者非謂氣機止息而如死灰稿木也動者升
也靜者降也動者發生也靜者收斂也春夏屬陽動也秋
冬屬陰靜也正如人之呼爲春夏吸爲秋冬吸則陽在腹
內呼則散之于外秋冬氣收斂于地中春夏氣發生于地

表

孔子語常而不語怪者以爲不足怪也怪者常之偏勝反
悖之氣也人能知常則萬怪變生于前而不爲臯惑皆知
其有原也請于說卦通神明之德類萬物之情而觀之既
曰生生而變化無窮何所不有而仁義禮智信五常也盡
其常則義理無窮反其常則變怪亦無窮然一一皆有其
原也

乾坤三爻純陰純陽三氣不相雜外六子不過一陰二陽
一陽二陰兩端而已天地奇偶之數五十五至于揲著則
止用五十者何也蓋參天兩地而五十者天地之正數也
衍而得之者餘數也尊其正數而不敢用故用其衍數也

五十之中又尊一爲太極而不用故用四十九也

用九用六只是訓爲處剛處柔也處剛則戒其無首處柔則戒其永貞亦抑其太過而強其不足也發此例子乾坤當于六十四卦爻中觀之然後見聖人用九六之道

謂太極生兩儀亦可謂太極分兩儀則亦可一生二二生四四生八八一分爲二二分爲四四分爲八以天地觀之則生以卦畫觀之則分雖然言生不言分則不明言分不言生則不備一分爲二一奇一偶二分爲四太陰少陽既分而

爲四則每爻上又生一奇一偶四分爲八亦然一分一加爲十六十六爲三十二三十二爲六十四只是一分一加

耳此聖人畫卦得生成之自然故曰分陰分陽迭用柔剛
故易六位而成章詩書語孟之命意措詞不一體而足千
變萬化觀之者當以意逆志况易乎有直陳其事直言其
理者易見言在此同意在彼或比或類或嘆詠或奇或常
或幽深或平易或警悟或戒勅然則聖人作意于文辭與
曰非也譬如雷霆雨露江漢河海潤澤聲響小大之不同
顧所遇之地所過之時何如耳

論卦象而不係於義理之得失不關於實用之取舍者反
對是也如朱震曰豫謙之反謙九三反而之四爲豫何係
於義理用舍哉以二卦論之謙何係於豫豫何係於謙哉

朱震所以必從謙說者只欲就九三則互體上坤中坎坤中有水師之象耳師動而往行師也三公位反之則四四侯位有建侯之象坤伏乾天地也坎伏離日月也取象如是則與彖辭相合聖人之於易固觀象而繫辭然而必如是之牽合附會細碎曲折恐非聖人之本心也非義之正大也

大而堯舜之授受湯武之征伐九年之水七年之旱細而一政一事之得失一草一木之生死皆孰使之然哉造物也孰爲造物二氣也易以道陰陽之小大無遺變化無窮可以知未來內則修身外則治天下大則贊化育得天地

之心類萬物之情君子可不朝夕洗心死而後已耶

六十四卦卦辭每戒以利貞何也孝弟忠信吉德也仁義禮智恒性也當其理爲正不當其理則邪枉偏陂則反爲吉德恒性之害况外物歟故聖人於每卦之下必戒之以貞貞者無毫髮之偏倚四方望之以爲表極至子思則名之曰中故曰人之生也直罔之生也幸而免直其正也貞者端正無偏倚無過不及而又常永堅固久之而如是是以無所不亨無所不利也

先儒論卦變亦有太繁細而不切於實用求其所由來恐非聖人之本意亦無義理如云某卦自某卦來某卦復自

某卦來難爲確論一陰五陽一陽五陰二陰五陽二陽五陰何往何變而不可必曰某卦自某卦來求之義理則無定義較之實用則無所用本之聖人畫卦之始則繁碎而無統紀又不能如八而八之變而爲六十四之有源有委有綱有目整齊窮盡不亂不滯也此無他因以易變易之書偶有所見移東易西折南補北遂以爲知易之變易曰變通莫大乎四時此聖人恐人妄以紛擾錯雜爲變故揭此語以垂示使人觀四時之變則六十四卦之變同於四時而又繼之以通變而不能通非知天地四時之變者也故又曰易窮則變不窮則不變此天地物理之常也所以

謂窮者無他陽極而陰陰極一而陽本乎一氣之聚散生消而已故又言乾以易知坤以簡能何嘗細碎紛擾朝更暮改好變之不常也朱震以晉卦自臨來蹇之變又曰蹇六三之柔進而與君同德故曰順而麗乎大明柔進而上行朱震卦變反復展轉止欲附會柔進上行之一言若自觀卦中來者六四升於五九五降於四亦通謂自臨蹇中來於晉卦義理亦無關係謂自觀卦中來無矛盾然則卦變之說果何用哉蹇變而爲臨也無義理臨反而成觀變愈多而義愈遠牽強太甚卦變之說類如此然則晉彖所謂柔進而上行者何也天尊地卑乾高坤下剛上柔下此正

理也坤陰上交於乾爲離乾陽下交於坤爲坎又晉卦六
五一爻當尊位故曰柔進而上行

諸儒見卦之變或云某卦自某卦來所說雖不同以愚觀
之似皆不求其原譬如論水不討其源隨其分派旣多則
曰此水自某所來此水又自某所來此水復自某所來殊
不知萬派總出於一流一流出於一源以諸爻彖辭觀之
六十四卦之變似皆出於乾坤二卦何以言之彖辭所論
卦才卦德不過乎剛柔如曰柔來而文剛分剛上而文柔
又曰剛上而柔下剛中正又曰內陰而外陽內陽而外陰
剛柔旣交則爲健動止險說伏麗順入物之性情爲萬事

之吉凶

六十四卦之名固出於聖人之口然理以象著象以理實
數以理定理以數顯易本於象數以聖人觀之不待言語
文字則天地萬物之消長人事之進退存亡昭布森列而
無一不備此邵子所謂若論先天一字無止有六十四卦
而已聖人憂後人之不知不能推廣而至於變化之無窮
故繫之以辭以爲易之注腳故曰後天方始見功夫

蕩蕩上帝下民之辟言天之廣大覆育乃下民之君也今
人之爲惡不惟不爲天之弔卹反見疾惡見威怒於上帝
故其命亦多邪僻而不正天命本可信今日似爲不可信

何則人受天命以生凡事皆有初而無終狂悖不恆不可
救藥此亦言無所歸咎而歸之於天也下七章假文王歎
紂之辭以譏厲王二章言用人之道當使賢者在位能者
在職曷嘗以強梁暴虐急斂之人在位任事莫非天降此
惰慢之人以之害民歟無乃汝爲君者以力助之歟三章
嗟歎殷紂曰汝執所見以爲善人者不知皆強暴之人徒
增多民之怨懟使下民流言以爲對寇攘之惡用於內使
下民興起詛祝無所不至而無有窮極四章嗟紂以嚴猛
爲能舉怨爲德紂不自明其明德賢者退而窮處故曰與
讒諂面諛之人居雖有左右前後侍御僕從之人而如無

人也五章譏誦酒作狂所從所用皆不合於義舉止旣愆不分晝夜而號呼歌舞白晝朋淫而無忌憚以晝爲夜矣六章言小人乘是肆志口口爭鳴如蜩如螗紛亂辯競如沸如羹矣大臣小臣日趨於敗正人相尙從而行之此風內熾於中國而延及鬼方七章言旣不用善人不遵先憲大命以之傾覆八章歎其禍未及於四海而宗國顛覆矣爲殷之監豈遠哉曷不以夏桀之事觀之

威儀抑抑敬慎所著也如書所謂克自抑畏嚴恭寅畏者也有諸內形諸外嚴於外所以養其中也德誠於中威儀嚴慎見乎外未有心不重慎而威儀之可畏可象者也旣

誠於中又謹於外交相涵養以爲驗故曰惟德之隅靡哲不愚靡哲者不敢以明哲自居也不敢以明哲自居則窮理養性惟日不足故能不愚庶人之愚者其職分稟賦宜有此疾哲人而亦愚則反常矣肉食者鄙亦靡哲不愚之謂也蓋譏居高明者皆愚也亦通

無競惟人競疆也不恃其力之疆大惟務於得人

得人者得人心

得賢人衆多

故四方取以爲訓有覺德行

覺德行以先覺衆多覺後覺之意

上之

人德行雖備於身又能以善及人養人使人皆覺悟遷善遠罪而不自知所謂以德服人中心悅服故四國順之訂謨定命訂者歎嗟論難也謨謀議也一訂一謨莫不中理

定爲命令發號施令告於四方使人入耳銘心而不能忘
雖隔歲年之遠猶若今辰之告言猶在耳銘豈忘心之謂
也譬如書之誥訓誓命使萬世之下讀之聽之尙能練動
人心況當時之人乎唐德宗奉天一詔至今猶能感人然
則王言之發豈可不誠不慎哉敬慎威儀維民之則以身
教者自天子至於庶人皆以修身爲本也則者言而世爲
天下法行而世爲天下則之意也此二章旣泛論在人上
者不可不如是之修省三章乃言今日之失曰興迷亂於
政興者相翼相助相尙相長之謂也政正也旣昏迷紊亂
不能自正又迷亂先王之政典以至顛覆其德而不修整

荒湛於酒而縱恣沈湎汝輩惟耽樂是從不念承繼先業之重不能徧求先王之成憲其能執守其明法歟裁者培之傾者覆之人自喪德天亦不能加護而厭棄之故曰肆皇天弗尙使汝如泉之流下而不反無乃淪陷相與以危亡自今已往夙興夜寐當嚴肅靖恭於朝廷之上立萬民之表章以至於修車馬備器械預戒戎兵之興作遠慮於不虞之蠻方五章六章復以敬身謹言爲戒七章敬慎之功益密專以慎獨爲戒八章言行修而人法之九章言聽之非艱行之惟艱十章戒警勿以癡騃自處當以老成自警十一章言天明可畏我之所以不樂者觀爾所爲夢夢

然畧不省悟是以我心憂慘雖前後誨爾諄諄而聽我則藐藐忽略不以我心爲教反以我爲相虐借曰年幼不知而今亦已耄矣十二章不勝嗟嘆而言曰告爾誨爾久矣汝若聽用我之謀議庶無大悔天運方入于艱危將喪亡其國我之取喻夫豈遠哉昊天之明命亦無差忒汝若回僻其德而不改使民人急於汝夫民今而後得反之也

紫山大全集卷三十四終